

禮儀典第一百八卷

謚法部彙考四

元

世祖至元三年上烈祖以下帝后尊謚 按元史世祖本紀至元三年冬十月丁丑太廟成丞相安

童伯顏言祖宗世數尊謚廟號增祀四世各廟神主配享功臣法服祭器等事皆宜定議命平章政事趙璧等集羣臣議定爲八室 按太祖本紀至元三年冬十月追謚聖武皇帝 按太宗本紀追

謚英文皇帝廟號太宗 按定宗本紀追謚簡平皇帝廟號定宗 按憲宗本紀追謚桓肅皇帝廟

號憲宗 按睿宗傳諱拖雷妃怯烈氏子十一人長憲宗次四則世祖也憲宗立追謚曰英武皇帝

廟號睿宗世祖至元二年改謚景襄皇帝 按太祖光獻翼聖皇后傳后名旭真弘吉刺氏世祖至

元二年十二月追謚光獻翼聖皇后冊文曰尊祖宗致誠孝實王政之攸先法天地建鴻名亦母儀之克稱肆先虔於太室庸昭示於後昆體茲至公節以大惠欽惟光獻皇后宅心淵靜稟德柔嘉當

神聖創業之初有夙夜求賢之助功施社稷垂慈訓於景襄慶衍宮闈流徽音於莊聖協贊龍飛之

運承詒燕翼之謀惟周人著稱思齊亦推本興王之迹在漢世始諡光烈蓋篤申追遠之情是用稽
迪舊章增崇遺美謹遣攝太尉某奉玉冊玉寶加上尊諡曰光獻翼聖皇后伏惟淑靈降格典禮備
膺於億萬年茂隆丕祚升祔太祖廟 按太宗昭慈皇后傳后名脫列哥那乃馬真氏至元二年崩
追諡昭慈皇后升祔太宗廟 按定宗欽淑皇后傳定宗崩后抱子失列門垂簾聽政至元二年追
諡欽淑皇后 按憲宗貞節皇后傳后名忽都台弘吉剌氏至元二年追諡貞節皇后升祔憲宗廟
按睿宗顯懿莊聖皇后傳后名唆魯帖尼怯烈氏至元二年追上尊諡莊聖皇后 按祭祀志至
元三年秋九月始作八室神主設祔室冬十月太廟成丞相安童伯顏言祖宗世數尊諡廟號配享
功臣增祀四世各廟神主七祀神位法服祭器等事宜以時定乃命平章政事趙璧等事集議製尊
諡廟號定爲八室烈祖神元皇帝皇曾祖妣宣懿皇后第一室太祖聖武皇帝皇祖妣光獻皇后第
二室太宗英文皇帝皇伯妣昭慈皇后第三室皇伯朮赤皇伯妣別土出迷失第四室皇伯考察合
帶皇伯妣也速倫第五室皇考睿宗景襄皇帝皇妣莊聖皇后第六室定宗簡平皇帝欽淑皇后第
七室憲宗桓肅皇帝貞節皇后第八室十一月戊申奉安神主於祔室

至元二十二年諡皇太子曰明孝 按元史世祖本紀不載 按祭祀志至元二十二年十二月丁未皇太子薨太常博士議曰前代太子薨梁武帝諡統曰昭明齊武帝諡長懋曰文惠唐憲宗諡宣曰惠昭金世宗諡允恭曰宣孝又建別廟以奉神主准中祀以陳登歌例設令丞歲供灑掃斯皆累代之典莫不追美洪休時中書翰林諸老臣亦議宜加諡立別廟奉祀遂諡曰明孝太子作主用金至元二十三年夏四月庚戌制諡法 按元史世祖本紀云云

至元三十一年上世祖尊諡並追上皇后弘吉刺氏及皇考裕宗尊諡 按元史世祖本紀至元三十一年夏四月皇孫至上都卽皇帝位丙午中書右丞相完澤及文武百官議上尊諡壬寅始爲壇於都城南七里甲辰遣司徒兀都帶平章政事不忽朮左丞張九思率百官請諡於南郊五月戊午遣攝太尉臣兀都帶奉冊上尊諡曰聖德神功文武皇帝廟號世祖國語尊稱曰薛禪皇帝是日完澤等議同上先皇后弘吉刺氏尊諡曰昭睿順聖皇后 按成宗本紀至元三十一年夏四月卽皇帝位追尊皇考曰皇帝遣攝太尉兀都帶等請諡於南郊五月遣攝太尉兀都帶奉玉冊玉寶上大行皇帝尊諡曰聖德神功文武皇帝廟號世祖皇后尊諡曰昭睿順聖皇后皇考尊諡曰文惠明孝

皇帝廟號裕宗六月以世祖皇后裕宗諡號播告天下 按裕宗傳文惠明孝皇帝諱真金世祖嫡子也母昭睿順聖皇后弘吉烈氏至元二十二年薨壽四十有三成宗卽位追諡曰文惠明孝皇帝廟號裕宗祔於太廟 按世祖昭睿順聖皇后傳至元十四年二月崩三十一年成宗卽位五月追諡昭睿順聖皇后其冊文曰奉先思孝臣子之至情節惠易名古今之大典惟殷娥有明德之號而周任著思齊之稱爰考舊章式崇尊諡恭惟先皇后厚德載物正位承天隆內治於公宮綱大倫於天下曩事龍濟之邸及乘虎變之秋鄂渚班師洞識事機之會上都踐祚居多輔佐之謀先物之明獨斷於衷進賢之志允叶於上左右我聖祖建帝王之極功撫育我前人嗣社稷之重託臣下之勤勞灼見生民之疾苦周知儷宸極二十年垂慈範千萬世唯全美聖而益聖宜顯冊書而屢書不勝惓惓懇懇之誠敬展尊尊親親之義以揚盛烈以對耿光謹遣某官某奉玉冊玉寶上尊諡曰昭睿順聖皇后欽唯淑靈在天明鑒逮下增輝煒管茂揚徽懿之音合饗太宮益衍壽昌之福升祔世祖

廟

成宗大德四年請上皇太后尊諡寶冊 按元史成宗本紀大德四年春二月皇太后崩秋七月右

丞相完澤請上徽仁裕聖皇后諡寶冊 按裕宗徽仁裕聖皇后傳后名闊闕真弘吉刺氏生順宗

成宗成宗卽皇帝位尊后爲皇太后大德四年二月崩諡曰裕聖皇后升祔裕宗廟

大德十一年上帝尊諡並追諡皇考及元妃弘吉刺氏 按元史成宗本紀大德十一年正月崩於

玉德殿九月諡曰欽明廣孝皇帝廟號成宗國語曰完澤篤皇帝 按武宗本紀大德十一年夏五

月皇帝卽位於上都追尊皇考曰皇帝六月中書右丞相哈刺哈孫答刺罕左丞相塔刺海言臣等

與翰林集賢太常老臣集議皇帝嗣登寶位詔追尊皇考爲皇帝皇考大行皇帝同母兄也大行皇

帝祔廟之禮尙未舉行二帝神主依兄弟次序祔廟爲宜今擬請諡皇考昭聖衍孝皇帝廟號順宗

大行皇帝曰欽明廣孝皇帝廟號成宗先元妃弘吉刺氏失憐苔里宜諡曰貞慈靜懿皇后祔成宗

廟室制曰可秋九月請諡皇考皇帝大行皇帝於南郊命中書右丞相塔刺海攝太尉行事命塔刺

海奉玉冊玉寶上皇考及大行皇帝尊諡廟號又上先元妃弘吉刺氏尊諡祔於成宗廟室 按順

宗傳順宗昭聖衍孝皇帝諱荅刺麻八剌裕宗第二子也子三人長曰阿木哥封魏王郭出也妃所

生者曰海山是爲武宗曰愛育黎拔力八達是爲仁宗大德十一年秋武宗卽位追諡曰昭聖衍孝

皇帝廟號順宗祔享太廟

武宗至大二年加上太祖睿宗及光獻莊聖二后尊諡並詔定百官三品以上請諡例 按元史武宗本紀至大二年冬十二月親饗太廟上太祖聖武皇帝尊諡廟號及光獻皇后尊諡又上睿宗景襄皇帝尊諡廟號及莊聖皇后尊諡詔定流官封贈等第內外百官三品以上者許請諡凡請諡者許其家具本官平日勲勞政績德業藝能經由所在官司保勘與本家所供相同轉申吏部考覆呈都省準擬令太常禮義院驗事蹟定諡若勲戚大臣奉旨賜諡者不在此例 按太祖本紀至大二年冬十二月加諡法天啟運聖武皇帝廟號太祖 按睿宗顯懿莊聖皇后傳至大二年十二月加諡顯懿莊聖皇后 按祭祀志至大二年春正月乙未以受尊號恭謝太廟十月以將加諡太祖睿宗擇日請太祖睿宗尊諡於天擇日請光獻皇后莊聖皇后尊諡於廟改製金表神主題寫尊諡廟號十二月乙卯親享太廟奉玉冊玉寶加上太祖聖武皇帝尊諡曰法天啟運廟號太祖光獻皇后曰翼聖加上睿宗景襄皇帝曰仁聖廟號睿宗莊聖皇后曰顯懿其舊制金表神主以櫝貯兩旁自是主皆範金作之如金表之製

至大三年追上睿宗裕宗成宗三后冊諡 按元史武宗本紀不載 按睿宗顯懿莊聖皇后傳至
大三年十月又上玉冊其文曰祖功宗德稱誅於天內則闡儀受成於廟行之大者名必顯恩之隆
者報則豐上以增佐定之光下以伸遁追之孝欽唯莊聖皇后英明溥博聖善柔嘉尊儷景襄陰教
純被逮事光獻婦職勤修勲聿著於承天祥兩占於夢日跡聖緒洪源之有漸知深仁厚澤之無垠
元符肇自塗山顧前徽之未稱蒼籙興於文母豈後嗣之能忘是用叅攷彝經丕揚景鑠敷繹寶慈
之誼形容青史之規謹遣攝太尉某奉玉冊玉寶加上尊諡曰顯懿莊聖皇后伏惟睿靈昭垂鑑格
禮嚴闕宮樂歌夷則億萬斯年承休無斁 按裕宗徽仁裕聖皇后傳至大三年十月又追尊諡曰
徽仁裕聖皇后 按成宗貞慈靜懿皇后傳武宗至大三年十月追尊諡貞慈靜懿皇后其冊文曰
宗祧定位象天地之有陰陽今古同符通幽明以行典禮哀榮斯備孝敬兼陳恭惟先元妃弘吉刺
氏慶毓仙源德昭彤史春宮主饋共瞻采翟之輝椒掖正名莫際龍飛之會惟貞協在中之美而慈
推成物之仁靜既合夫坤元懿益彰於壺則雖小星之逮下豈衆曜之敢齊嗣服云初追懷曷已是
用究成先志式闡徽稱謹遣某官某上尊諡曰貞慈靜懿皇后升祔於成宗皇帝殿室伏惟淑靈永

伸配侑介以景福佑我無疆

至大四年上武宗尊諡 按元史武宗本紀至大四年春正月帝崩於玉德殿夏五月文武百官也先鐵木兒等上尊諡曰仁惠宣孝皇帝廟號武宗國語曰曲律皇帝是日請諡南郊閏七月祔於太廟

仁宗延祐七年上大行皇帝諡 按元史仁宗本紀延祐七年春正月辛丑帝崩於光天宮五月乙未羣臣上諡曰聖文欽孝皇帝廟號仁宗國語曰普賢篤皇帝 按英宗本紀延祐七年夏五月乙未請大行皇帝諡於南郊秋八月丙辰祔仁宗聖文欽孝皇帝莊懿慈聖皇后於太廟鐵木迭兒攝太尉奉玉冊行事

英宗至治二皇上皇太后諡 按元史英宗本紀不載 按仁宗莊懿慈聖皇后傳英宗卽位遣官奉冊上尊號曰皇太后至治二年崩上諡莊懿慈聖皇后其冊文曰致孝所以揚親易名所以表行矧爲天下母而養弗逮履天子位而報則豐曷勝孺慕之心必盡欽崇之禮欽惟先皇太后夙明靈則克嗣徽音輔佐先朝有恭儉節用之實誕育眇質有劬勞顧復之恩九族咸育於仁四海仰遵其

化昊天不弔景命靡融愴聖善之長違念風猷之未泯是用揄揚於彤史正宜敷繹於寶慈爰據彝經追嚴徵號謹遣攝太尉某官某奉玉冊玉寶上尊號曰莊懿慈聖皇后伏惟淑靈如在合饗太宮鑑格孔昭膺茲鉅典陰相丕祚億萬斯年升祔仁宗廟

至治三年三月上太皇太后尊諡八月泰定帝卽位追上皇考皇妣諡號 按元史英宗本紀至治二年九月太皇太后崩十一月定諡太皇太后曰昭獻元聖遣太常禮儀院使朶台以諡議告於太廟三年三月祔太皇太后於順宗廟室遣攝太尉中書右丞相拜住奉玉冊玉寶上尊諡曰昭獻元聖皇后 按泰定帝本紀至治三年八月卽帝位於龍居河十二月請皇考皇妣諡於南郊皇考晉王曰光聖仁孝皇帝廟號顯宗皇妣晉王妃曰宣懿淑聖皇后以追尊皇考皇妣詔天下 按顯宗傳顯宗光聖仁孝皇帝諱甘麻剌裕宗長子也大德六年薨後十年仁宗卽位諡王獻武又十一年英宗遇弒也孫帖木兒以嗣晉王卽皇帝位追尊曰光聖仁孝皇帝廟號顯宗 按顯宗宣懿淑聖皇后傳后名普顏怯里迷失弘吉剌氏顯宗居晉邸納爲元妃生泰定帝泰定元年追尊宣懿淑聖皇后其冊文曰祇纘皇圖方弘仁孝之化追崇聖母永懷鞠育之恩匪建鴻名疇彰厚德欽惟皇妣

晉王妃弘吉刺氏淑倅周妣賢邁虞嬪儷我先王恪守肇基之地昭其懿範益恢正始之風順坤道以承乾炯月輝以遡日陰功久積衍聖緒於無疆神器攸歸知慶源之有自仰徽音之如在慨至養之莫加聿選休辰爰修縟典謹遣攝太尉某奉玉冊玉寶上尊諡曰宣懿淑聖皇后伏惟淑靈在上式垂鑒臨合享太宮永錫繁祉升祔皇考顯宗廟

泰定帝泰定元年請帝諡於南郊 按元史泰定帝本紀泰定元年春二月壬申請上大行皇帝諡於南郊曰睿聖文孝皇帝廟號英宗

泰定四年上武宗皇后及英宗皇后尊諡 按元史泰定帝本紀泰定四年八月諡武宗皇后曰宣慈惠聖英宗皇后曰莊靜懿聖升祔太廟 按武宗宣慈惠聖皇后傳后名真哥弘吉刺氏泰定四

年十一月崩上尊諡曰宣慈惠聖皇后升祔武宗廟 按英宗莊靜懿聖皇后傳后名速哥八剌亦

散烈氏至治元年冊爲皇后泰定四年六月崩諡曰莊靜懿聖皇后 按本紀上武宗后諡在八月而傳稱十一月后崩疑誤

文宗天曆二年春追上皇妣亦乞烈氏唐兀氏及明宗諡 按元史文宗本紀天曆二年春二月

書省議追尊皇妣亦乞烈氏曰仁獻章聖皇后唐兀氏曰文獻昭聖皇后命有司具冊寶冬十月丙

申中書省臣言臣等謹集樞密院御史臺翰林集賢院奎章閣太常禮儀院禮部諸臣僚集議上大行皇帝尊諡曰翼獻景孝皇帝廟號明宗國言諡號曰護都篤皇帝是日奉玉冊玉寶於太廟如常儀 按明宗本紀天曆二年八月帝崩冬十二月知樞密院事臣也不倫等議請上尊諡曰翼獻景孝皇帝廟號明宗三年三月壬申祔於太廟 按武宗后妃傳妃二人亦乞烈氏生明宗天曆二年追諡仁獻章聖皇后唐兀氏生文宗天曆二年追諡文獻昭聖皇后

至順三年追諡顏子父母及妻戴氏 按元史文宗本紀至順三年五月丁酉追封顏子父顏無繇爲杞國公諡文裕母齊姜氏杞國夫人諡端獻妻宋戴氏兗國夫人諡貞素

順帝元統二年追上文宗諡號 按元史順帝本紀元統元年冬十一月追諡札牙篤皇帝爲聖明元孝皇帝廟號文宗時寢廟未建於英宗室次權結綵殿以奉安神主二年春正月以上文宗皇帝諡號遣官告祭於南郊夏四月奉聖明元孝皇帝文宗神主祔於太廟躬行告祭之禮樂用宮懸禮三獻先是御史臺臣言郊廟國之大典王者必行親祀之禮所以盡尊尊親親之誠宜因升祔有事於太廟帝從之 按文宗本紀至順三年帝崩元統二年正月太師右丞相伯顏率文武百官等議

上尊諡曰聖明元孝皇帝廟號文宗國言諡號曰札牙篤皇帝請諡於南郊三月祔於太廟

至元元年命嚴諡法以絕冒濫 按元史順帝本紀云云

至元二年追上帝生母太后尊諡 按元史順帝本紀至元元年春三月庚子中書省臣言帝生母

太后神主宜於太廟安奉命集議其禮二年春二月丁酉追尊帝生母邁來迪爲貞裕徽聖后

至元三年上寧宗尊諡 按元史順帝本紀至元二年十二月丙子詔省院臺翰林集賢奎章閣太

常禮儀院禮部官定議寧宗皇帝尊諡廟號三年春正月升祔懿璘只班皇帝於廟諡沖聖嗣孝皇

帝廟號寧宗 按寧宗本紀至元四年三月諡曰沖聖嗣孝廟號寧宗四月祔於太廟

至元六年追上皇考尊諡 按元史順帝本紀至元六年冬十月奉玉冊玉寶尊皇考爲順天立道

睿文智武大聖孝皇帝親祔於太室

至正二十二年追封宋儒朱子及父松諡 按元史順帝本紀不載 按祭祀志至正二十二年十

二月追諡朱熹父爲獻靖其制詞云考德而論時灼見風儀之俊觀子而知父追聞詩禮之傳久闕

幽堂丕昭公論故宋左承議郎守尙書吏部員外郎兼史館校勘累贈通議大夫朱松仕不躁進德

合中行遯鄒魯之淵源式開來學闡圖書之蘊奧妙契元機奏對雖忤於權姦嗣續篤生於賢哲化民成俗著書滿家既繼志述事之光前何節惠易名之孔後才高弗展嗟沈滯於下僚道大莫容竟昌明於永世神靈不昧休命其承可謚獻靖其改封熹爲齊國公制詞云聖賢之蘊載諸經義理實明於先正風節之厲垂諸世褒崇豈間於異時不有鉅儒孰膺寵數故宋華文閣待制累贈寶謨閣直學士太師追封徽國公謚文朱熹挺生異質蚤擢科名試用於郡縣而善政孔多迴翔於館閣而直言無隱權姦屢挫志慮不回著書立言嘉乃簡編之富愛君憂國負其經濟之長正學久達於中原渙號申行於仁廟詢諸僉議宜易故封國敢營丘爰錫太公之境土壤鄰洙泗尙觀尼父之宮牆緬想英風載欽新命可追封齊國公餘並如故

明

明制謚法帝后以下字各有差及文武大臣與否取自上裁官品未高特恩賜謚不拘常例 按續文獻通考國朝謚法凡皇帝十七字皇后十三字皇妃東宮東宮妃二字親王用一字郡王用二字其文武大臣亦用二字與否取自上裁若官品未高而侍從有勞或死勤事特恩賜謚者不拘常例

夷王得特賜諡洪武初議諡俱禮部奉旨施行

太祖洪武元年追上四世考妣尊諡 按大政紀洪武元年正月壬申朔乙亥追尊四世考妣爲皇

帝皇后 按明會典洪武元年上高祖考尊諡曰元皇帝廟號德祖妣曰元皇后曾祖考尊諡曰

恆皇帝廟號懿祖妣曰恆皇后祖考尊諡曰裕皇帝廟號熙祖妣曰裕皇后考尊諡曰淳皇帝廟號

仁祖妣陳氏曰淳皇后

洪武六年議賜諸功臣諡 按明外史廖永安傳洪武六年帝念天下大定諸功臣如永安及俞通

海張德勝桑世傑耿再成胡大海趙德勝皆已前歿猶未有諡號乃下禮部定議議曰有元失馭四

海糜沸英傑之士或起義旅或保一方泯泯棼棼莫知所屬真人奮興不期自至龍行而雲虎嘯而

風若楚國公安等皆熊羆之士膂力之才非陷堅沒陣卽罹變捐軀義與忠俱名耀天壤陛下混

一天下追惟舊勞爵祿及子孫烝嘗著祀典易名定諡於禮爲宜臣謹按諡法以赴敵逢難諡臣永

安武閔殺身克戎諡臣通海忠烈奉上致果諡臣張德勝忠毅勝敵致強諡臣大海武莊關土斥境

武而不遂諡臣再成武壯折衝禦侮壯而有力諡臣趙德勝武桓臣世傑業封永義侯與漢世祖封

恂景丹相類當卽以爲謚詔從其議又皆加贈開國輔運推誠宣力武臣光祿大夫柱國同知大都督府事已又改封永安鄭國公無子授其從子昇爲指揮僉事

洪武二十五年定議謚法 按明會典凡議謚洪武初俱禮部奉旨施行二十五年令禮部行翰林院擬奏請旨凡親王謚例用一字郡王二字

成祖永樂元年上太祖高皇帝高皇后尊謚 按明會典永樂元年上高廟尊謚曰聖神文武欽明

啟運俊德成功統天大孝高皇帝廟號太祖后馬氏曰孝慈昭憲至仁文德承天順聖高皇后 又上

太祖高皇帝高皇后謚號儀前期三日齋戒遣官祭告天地宗廟社稷鴻臚寺設冊寶輿及香案於奉天殿是日早內侍先以冊寶置於案太常寺先設冊寶案於太廟門外丹陛上皇考皇妣神御前

各設冊寶案鴻臚寺設冊寶輿於奉天門外御道上錦衣衛設鹵簿教坊司設中和韶樂大樂如常

儀文武百官具祭服詣太廟門外立俟執事官并宣冊寶官先從太廟右門以序立於殿右上具袞

冕御華蓋殿捧冊寶官四員各具祭服於奉天殿東西序立鴻臚寺奏請行禮導駕官導上出奉天

殿冊寶案前捧冊寶官各捧冊寶前行導駕官導上行至奉天殿丹陛上捧冊寶官各以冊寶置綵

輿內鹵簿大樂前導上乘輿隨綵輿後行至午門外降輿乘輅至太廟門文武百官皆跪俟綵輿過興上降輅隨綵輿至太廟中門外置綵輿於中道捧冊寶官各於綵輿內取冊寶前行隨行至丹陛上捧冊寶置於案典儀唱樂舞生就位執事官各司其事內贊奏就位導引官導上就拜位典儀奏迎神奏樂樂止內贊奏上四拜

百官同

典儀奏進冊寶捧冊寶官以次捧冊寶前行導引官導上由左

門入至廟中捧冊寶官序立於執事官及宣冊寶官之前導引官導上詣皇考妣神御前奏跪奏摺圭奏進冊捧冊官以冊跪進於上左上受冊以冊授執事官置於案左奏出圭贊宣冊宣冊官跪宣於上左訖奏摺圭奏進寶捧寶官以寶跪進於上左上受寶以寶授執事官置於案右奏出圭贊宣寶宣寶官跪宣於上右訖上復位奏四拜

文武百官皆四拜

興行祭禮如常儀次日頒詔

永樂五年上大行皇后諡 按明會典永樂五年仁孝文皇后冊諡儀前期禮部奏行祭告禮及請命頒冊寶等官是日上躬告天地於奉天殿丹陛上宮中先設冊寶案於几筵殿設香案於冊寶案前上御華蓋殿文武百官於奉天殿前丹墀內分班序立引禮引頒冊寶官至華蓋殿拜位序班舉冊寶案置殿中鴻臚寺官奏頒冊寶官行禮引禮贊四拜畢贊跪傳制官傳制曰永樂五年十月十